

摘藻堂四庫全書薈要

史部

欽定四庫全書薈要

史部

通志卷四十三

詳校官員外郎臣楊世綸



欽定四庫全書薈要卷八千九百四十二

史部

通志卷四十三

宋 右 迪 功 郎 鄭 樵 漁 仲 撰

禮略第二

吉禮下

宗廟 時享 薦新附 祫禘 功臣配享 天子七祀

諸侯附 上陵 拜掃及諸節上食附 釋奠 祀先代帝王 名臣附 老

君祠 先賢附 孔子祠 先儒附 太公廟 巡狩 封禪

歷代所尚

享司寒

藏冰開冰附

崇

葦茭桃梗

禋祠高

禘祫

諸雜祠

宗廟

唐虞立五廟其祭尚氣先迎牲殺於庭取血告於室以降神然後奏樂尸入王裸以鬱鬯夏氏因之商制七廟周制小宗伯掌建國之神位宗廟在左王立七廟一壇一墠曰考廟曰王考廟曰皇考廟曰顯考廟曰祖考廟皆月祭之遠廟為祧有二祧享嘗乃止去祧為壇去壇

為墀壇墀有禱焉祭之無禱乃止去墀曰鬼天子遷廟之主以昭穆合藏於二祧之中漢高帝令諸侯都皆立上皇廟高帝崩孝惠即位令奉常叔孫通定宗廟儀法帝東朝太后長樂宮及間往以數蹕煩民乃作複道武庫南通奏曰陛下何自築複道高帝寢衣冠月出游高廟子孫奈何乘宗廟道上行哉帝懼曰急壞之通曰人主無過舉今已作百姓皆知之矣願陛下為原廟渭北衣冠月出游之益廣宗廟大孝之本帝乃立原廟又尊

高帝廟為太祖廟景帝尊孝文廟為太宗廟所常幸郡國令各立太祖廟至宣帝太始二年復尊孝武廟為世宗廟凡所巡狩亦立焉凡祖宗廟在郡國者六十八合百六十七所而京師自高祖下至宣帝與太上皇悼皇考各於陵旁立廟并為百七十六又園中各有寢便殿寢日四上食廟歲二十五祠便殿歲四祠元帝時丞相韋元成等言春秋之義父不祭於支庶之宅元帝罷郡國廟以高皇帝為太祖孝文皇帝為太宗孝景皇帝為

昭孝武皇帝為穆孝昭與孝宣俱為昭皇考廟親未盡
太上孝惠廟皆親盡宜毀太上廟主宜瘞園孝惠帝為
穆主遷於太廟寢園皆罷修後漢光武皇帝建武二年
立高廟於雒陽四時祫祀高帝為太祖文帝為太宗武
帝為世宗如舊三年正月立新廟雒陽祀父南頓君以
上至舂陵節侯時寇賊未平祀儀未設至十九年中郎
將張純等議禮人子事大宗降其私親故孝宣帝以孫
後祖為父立廟於奉明曰皇考廟於是議立平哀成元

帝廟代今親廟兄弟以下使有司祠宜為南頓君立皇
考廟祭上至舂陵節侯羣臣奉祠詔以宗廟處所未定
且祫祭高廟其成哀平且祠祭長安故高廟其南陽舂
陵歲時各且因故園廟祭祀園廟去太守治所遠者在
所令長行太守事侍祠惟孝宣帝有功德其上尊號曰
中宗於是雒陽高廟四時加祭孝宣孝元凡五帝其西
廟成哀平三帝主四時祭於故高廟東廟京兆尹侍祠
冠衣車服如太常祠陵廟之禮皇考南頓君以上至節

侯皆就園廟所在郡縣侍祠明帝以光武中興更為起廟尊號曰世祖廟以元帝於光武為穆故雖非宗不毀也後遂為常明帝遺詔遵儉無起寢廟藏主於世祖廟更衣孝章初不敢違以更衣有小別上尊號曰顯宗廟間祠於更衣四時合祭於世祖廟章帝遺詔無起寢廟如先帝故事和帝初不敢違上尊號曰肅宗後帝承遵皆藏主於世祖廟積多無別自後顯宗但為陵寢之號靈帝時京都四時所祭高廟五主世祖廟七主少帝三

陵追尊后三陵凡牲用十八太牢皆有副倅故高廟三主親毀之後亦但殷祭之歲奉祠獻帝初平中董卓與蔡邕等以和帝以下功德無殊而有過差不應為宗及餘非宗者追尊三后皆奏毀之四時所祭高廟一祖二宗及近帝四凡七帝魏文帝受禪追尊大父曰大皇帝考曰武皇帝以洛京宗廟未成乃祠武帝於建始殿親執饋奠如家人禮明帝太和三年又追尊高祖大長秋曰高皇夫人吳氏曰高皇后並在鄴廟之所祠則文帝

之高祖處士曾祖高皇祖大皇帝共一廟考太祖武皇
帝特一廟百代不毀然則所祠止於親廟四室也其年
十一月洛京廟成則以親盡遷處士主置園邑使宗正
曹恪持節迎高祖以下神主共一廟猶為四室而已景
初元年六月羣公更奏定七廟之制曰武皇帝肇建洪
基為魏太祖文帝繼天革命為魏高祖上集成大命宜
為魏烈祖於太祖廟北為二祧其左為文帝廟號曰高
祖昭祧其右擬明帝號曰烈祖穆祧三祖之廟萬世不

毀其餘四廟親盡迭遷一如周后稷文武廟祧之禮晉武帝即位追尊皇祖宣王為宣皇帝伯考景王為景皇帝考文王為文皇帝權立一廟後用魏廟追祭征西將軍豫章府君潁川府君京兆府君與宣帝景帝文帝為三昭三穆是時宣皇未升太祖虛位所以祠六代與景帝為七廟六年因廟陷當改脩創羣臣議奏曰古者七廟異所自宜如禮又曰古雖七廟自近代以來皆廟七室於禮無廢於情為叙亦隨時宜也東晉元帝上繼武

帝於禮為禰如漢光武上繼元帝故事時西京神主陷於虜庭江左建廟皆更新造尋以登懷帝之主又遷潁川府君位雖七室其實五世蓋以兄弟為世數故也于時百度草創毀主權居別室太興三年將祭愍帝之主乃更定制還復豫章潁川於昭穆之位及元帝崩則豫章復遷至明帝崩而潁川又遷猶十室也于時續廣太廟故三遷主並還西儲名之曰祧以准遠廟成帝咸康五年始作武悼皇后神主祔廟配享世祖成帝崩而康

帝承統以兄弟一代故不遷京兆始十一室也康帝崩
穆帝立京兆遷入西儲同謂之祧如前三祖遷主之禮
故正室猶十一也穆帝崩而哀帝海西並為兄弟無所
登除咸安之初簡文皇帝上繼元皇帝於是潁川京兆
二主復還昭穆之位簡文崩潁川又遷孝武帝太元十
六年始改作太廟殿正室十四間東西儲各一間合十
六間棟高八丈四尺備法駕遷神主于行廟及孝武崩
京兆又遷如穆帝之世四祧故事宋武帝即尊位祠七

代為七廟永初初追尊皇考為孝皇帝皇妣趙氏為穆
皇后三年孝懿蕭皇后崩又祔廟高祖崩神主升廟猶
昭穆之序始魏晉之制虛太祖之位文帝元嘉初追尊
所生胡婕妤為章皇太后立廟於太廟西其後孝武昭
太后明帝宣太后並祔章太后廟齊高帝追尊父為宣
皇帝母為昭皇后七廟梁武帝受禪遷神主於太廟為
三昭三穆凡六廟追尊皇考為文皇帝皇妣為德皇后
廟號太祖皇祖特進以上皆不追尊擬祖遷於上而太

祖之廟不毀與六親廟為七皆同一堂共庭而別室陳
依梁制七廟如禮初文帝入嗣而皇考始興昭烈王廟
在始興國謂之東廟天嘉中徙神主祔於梁之小廟改
曰國廟祭用天子儀後魏之先居於漠北鑿石為祖宗
之廟於烏洛侯國西北明元帝永興四年立太祖道武
帝廟於白登山歲一祭具太牢帝親奉無常月又於白
登西太祖舊遊之處立昭成獻明太祖廟常以九月十
月之交帝親祭牲用馬牛羊又親行軀劉之禮孝文太

和三年六月親謁七廟十五年四月改營太廟詔曰祖

有功宗有德後者不得擅祖宗之名居二祧之廟令述
尊先志宜制祖宗之號烈祖有創業之功世祖有開拓
之德宜為祖宗百代不遷而遠祖平文功未多於昭成
然廟號為太祖道武建業之勲高於平文廟號為烈祖
比校似為未允朕今奉尊道武為太祖而立二祧餘皆
以次而遷十九年遷都洛邑二月詔曰太和廟已就神
儀靈主宜時奉寧可尅五月奉遷於廟其出金墉之儀

一准出代都太和之式入新廟之典可依近至金墉之軌其威儀鹵簿如出代廟百官奉遷宜可省之但令朝官四品以上侍官五品以上宗室奉迎北齊文宣帝受禪置六廟獻武以下不毀以上則遞毀並同廟而別室既而遷神主於太廟文襄文宣並太祖之子文宣初疑其昭穆之次欲別立廟衆議不同至二年秋始祔太廟四時并臘凡五祭禘祫如梁制後周之制思復古之道乃右宗廟而左社稷閔帝受禪追尊皇祖為德皇帝父

文王為文皇帝廟號太祖擬祖以上三廟遞遷至太祖

不毀其下相承置二昭二穆為五焉明帝崩廟號世宗
武帝崩廟號高祖並為祧廟不毀隋文帝受命遣兼太
保宇文善等奉策詣同州告皇考桓王廟兼用女巫同
家人之禮追尊桓王為武元皇帝皇妣為元明皇后奉
迎神主歸于京師改周制左宗廟而右社稷宗廟未言
始祖又無受命之祧自高祖以下置四親廟同殿異室
一皇高祖太原府君廟二皇曾祖康王廟三皇祖獻王

廟四皇考太祖武元皇帝廟擬祖遷於上而太祖之廟不毀至煬帝立七廟太祖各一殿准周文武二祧與始祖而三餘並分室而祭唐武德元年追尊號高祖曰宣簡公曾祖曰懿王祖曰景皇帝考曰元皇帝法駕迎神主祔于太廟始享四室貞觀九年高祖崩詔增修太廟中書侍郎岑文本議曰祖鄭玄者則陳四廟之制述王肅者則引七廟之文貴賤混而莫辨是非紛而不定春秋穀梁傳及禮記王制祭法禮器孔子家語並云天子

七廟諸侯五廟大夫三廟士一廟尚書咸有一德曰七世之廟可以觀德至於荀卿孔安國劉歆班彪父子孔昆虞燾干寶之徒商較今古咸以為然故其文曰天子三昭三穆與太祖之廟而七是以晉宋齊梁皆依斯義立親廟六若使違羣經之正說從累代之疑議背子雍之篤論遵康成之舊學則天子之禮下逼於人臣諸侯之制上僭於王者非所謂尊卑有序名位不同者也臣等參詳請依晉宋故事立親廟六其祖宗之制式遵舊

典制從之於是增修太廟始崇弘農府君及高祖神主并舊四室為六室開元十年加置九廟移中宗神主就正廟仍創立九室其後制獻祖懿祖太祖世祖高祖太宗高宗中宗睿宗太廟九室也

時享

薦新附

有虞氏四時之制春曰禴夏曰禘秋曰嘗冬曰烝其祭尚氣郊特牲云血腥燭祭用氣也法先迎牲殺之取血告於室以降其神然後用樂而行祭事其祭貴首夏氏

時祭之名因有虞其祭貴心商人禴禘嘗烝亦因虞夏之制王制云春禴夏禘秋嘗冬烝其祭尚聲郊特牲云臭味未成滌蕩其聲樂三闋然後出迎牲聲音之號所以昭告於天地之間也其祭貴肝周祭春曰祠夏曰禴秋曰嘗冬曰烝以禘為殷祭之名其祭尚臭郊特牲云周人尚臭灌用鬯臭鬱合鬯臭陰達於淵泉既灌然後迎牲致陰氣也其祭貴肺行九獻之禮其四時新物皆先薦寢廟而後食二月獻羔開冰四月以彘嘗麥七月

登穀八月嘗麻九月嘗稻十二月嘗魚漢惠帝時叔孫
通曰古者有春嘗果方今櫻桃熟可獻宗廟諸果之獻
由此興漢光武帝建武二年春正月立高廟於雒陽四
時祫祀高帝為太祖文帝為太宗武帝為世宗如舊餘
帝不祀四時春以正月夏以四月秋以七月冬以十月
及臘一歲五祀靈帝時京都四時所祭高廟五主世祖
廟七主少帝三陵追尊后三陵凡牲用十八太牢古不
墓祭漢諸陵皆有園寢承秦所為也說者以為古宗廟

前廟後寢以象人君之居前有朝後有寢月令有先薦
寢廟詩稱寢廟奕奕言相通也廟以藏主以四時祭寢
有衣冠几杖象生之具以薦新物秦始出寢起於墓側
漢因而弗改故陵上稱寢殿起居衣服象生人之具建
武以來闕西諸陵以傳久遠但四時特牲祠天子每幸
長安謁諸陵乃太牢祠自雒陽諸陵至靈帝皆以晦望
二十四氣伏臘及四時祠廟日上飯太官送用物園令
食監典省其親陵所宮人隨鼓漏理被枕具盥水陳嚴

具魏初高堂隆云按舊典天子諸侯月有祭祀其孟則四時之祭也三牲黍稷時物咸備其仲月季月皆薦新之祭也大夫以上將之以羔或加以犬不備三牲也士以豚庶人則惟其時宜魚鴈可也皆有黍稷禮器曰羔豚而祭百官皆足太牢而祭不必有餘羔豚則薦新之禮也太牢則時祭之禮也詩云四月其蚤獻羔祭韭周之四月則夏之二月也月令仲春天子乃獻羔開冰季春之月天子始乘舟薦鮪仲夏之月天子乃以雛嘗黍

咸薦之寢廟此則仲季月薦新之禮也宋四時祭祀將祭必先夕牲皇帝散齋七日致齋三日百官掌事者亦如之致齋之日御太極殿幄坐著絳紗袍黑介幘通天金博山冠祠之日車駕出百官應齋從駕上水一刻皇帝著平冕龍袞服升金根車到廟北門治禮謁者各引太樂令太常光祿勳三公等皆入在位皇帝降車入廟脫舄盥及洗爵訖升殿初獻奠爵樂奏太祝令跪讀祝文訖進奠神座前皇帝還本位博士引太尉亞獻訖謁

者又引光祿勳終獻皇帝不親祠則三公行事而太尉
初獻太常亞獻光祿勳終獻齊永明元年正月詔太廟
四時祭薦宣皇帝麪起餅鴨臠孝皇后筍鴨卵脯醬炙
白肉高皇帝薦肉膾菹羹昭皇后炙魚皆所嗜也梁武
帝宗廟四時及臘一歲五享天監十六年詔曰夫神無
常饗饗於克誠所以西隣禴祭實受其福宗廟祭祀猶
有牲牢無益至誠有累冥道自今四時烝嘗外可量代
八座議以大脯代一元大武八座又奏既停宰殺無復

省牲之事請立省饌儀其衆官陪列並同省牲帝從之
又詔今雖無復用腥猶有脯脩之類即之幽明義為未
盡更可詳定悉薦時蔬左丞司馬筠等參議大餅代脯
餘悉用蔬菜從之於是至敬殿景陽臺立七廟座月中
再設淨饌自是訖於臺城破諸廟遂不血食陳制一歲
五祠謂春夏秋冬臘也每祭共以一太牢始祖以三牲
首餘惟骨體而已後魏孝文皇帝太和六年十一月將
親祀七廟有司依禮具儀於是羣官議曰昔有虞親虔

祖考來格商宗躬謁介福攸降大魏七廟之祭依先廟
舊事多不親謁今陛下孝誠發中思親執祀稽今古義
禮之常典臣等謹按舊章并採漢魏故事撰祭服冠屨
牲牢之具壘洗盥盥俎豆之器百官助祭位次樂官節
奏之引升降進退之法別集為親拜之儀制可於是帝
乃親祭其後四時常祭皆親之北齊制春祀夏禴秋嘗
冬烝皆以孟月凡四祭每祭室一太牢武成帝始以皇
后亞獻河清中定令四時祭廟及元日廟庭並設庭燎

二所後周之制其四時祭各於其廟亦以皇后亞獻其儀與北齊同所異者皇后亞獻訖后又薦加豆之籩其實菱芡芹蘗兔醢豕宰終獻訖皇后親徹豆降還版位然後太祝徹焉隋四時之祭各以太牢四時薦新於太廟有司行事而不出神主祔祭之禮並准時享唐四時各以其孟月享太廟室各用一太牢若品物時新堪進御者有司先送太常仍以滋味與新物相宜者配之太常卿及少卿一人奉薦太廟有司行事不出神主

祫禘

古者天子諸侯三年喪畢皆合先祖之神而享之以生
有慶集之懽死亦備合食之禮因天道之成而設禘祫
之享皆合先祖之神而享之虞夏先王崩新王元年二
年喪畢而祫三年春特禴夏特禘秋特嘗冬特烝四年
春特禴夏祫禘秋祫嘗冬祫烝每間歲皆然以終其世
商人先王崩新王二年喪畢而祫三年春特禘夏特禴
秋特嘗冬特烝四年春特禘夏祫禴秋祫嘗冬祫烝周

制天子諸侯三年喪畢禫祭之後乃祫於太祖來年春
禘于羣廟爾後五年再殷祭一禘一祫禘以夏祫以秋
祫祭之禮太宗伯出高祖以下木主守桃出先王先公
桃主皆入太祖后稷廟中於室中之奧西壁下東面布
太祖后稷位尸在東北面太祖之子於席前之北南面
為昭次昭之子在南方北面相對為穆以次而東孫與
王父並列直至禰其尸各居木主之左凡七尸用九獻
禘祭之禮一如祫祭所異者但祭毀廟以上不及親廟

其神主按鄭康成禘祫志云大王王季以上遷主祭於后稷之廟其坐位與祫祭同文武以下遷主若穆之遷主祭於文王之廟文王居室之奧東面文王孫成王居文王之東而北面以下穆主直至親盡之祖以次繼而東皆北面無昭主若昭之遷主祭於武王之廟武王亦居室之奧東面其昭孫康王亦居武王之東而南面以次亦繼而東直至親盡之祖無穆主也其尸位后稷廟中后稷尸一昭穆尸各一文王廟中文王尸一穆尸共

一武王廟中武王尸一昭尸共一後漢光武建武二十六年詔問張純禘祫之禮不行幾年純奏舊制三年一祫毀廟之主合食高廟存廟主未嘗合元始五年始行禘禮父為昭南向子為穆北向父子不並坐而孫從王父禘以夏四月陽氣在上陰氣在下故以正尊卑祫以冬十月五穀成熟物備禮成故骨肉合飲食今祖宗廟未定且合祭高廟遂以為常後以三年冬祫五年夏禘之時但就陳祭毀廟主而已謂之殷祭太祖東而惠文

武元四帝為昭景宣二帝為穆惠景昭三帝非殷祭時不祭也魏文帝太和四年六月武宣皇后崩至六年三月有司以今年四月禘告王肅議曰按春秋魯閔公二年夏禘于莊公是時纁經之中至二十五日大祥便禘不復禪故譏其速也去四年六月武宣皇后崩二十六日晚葬除服即吉四時之祭皆親行事今當計始除服日數當如禮須至禘月乃禘東晉昇平五年五月穆帝崩十月殷祭興寧三年二月哀皇帝崩明年太和元年

五月皇后庾氏崩十月殷祭太元二十一年十月應殷祭其九月孝武崩至隆安三年國家大吉乃殷祭元興三年夏應殷祭太常博士徐乾等議應用孟秋進用孟冬時安帝義熙三年當殷祭御史中丞范泰議以章后喪未一周不應殷祠時從太常劉瑾議小君之喪不以廢大禮往元興三年四月不得殷祀進用十月若計常限今當用冬若更起端則應四月時尚書奏從領司徒王謚議反初四月為殷祠之始徐邈議祫三時皆可者

蓋喪終則吉而禘服終無常故禘隨所遇惟春不禘故
曰特禘非殷祀常也宋制殷祭皆即吉乃行文帝元嘉
六年祠部定十月三日殷祀十三烝禮孝武大明七年
二月有司奏四月應殷祠若事中未得為得用孟秋詔從
之梁武帝初用謝廣議三年一禘五年一禘為之殷祭禘
以夏禘以冬後魏孝文帝太和十三年詔曰鄭康成云
天子祭圓丘曰禘祭宗廟大祭亦曰禘三年一禘五年
一禘禘則毀廟羣廟之主於太祖廟合而祭之禘則增

及百官配食者審諦而祭之魯禮三年喪畢而祫明年而禘圓丘宗廟大祭俱稱禘祭有兩禘明也王肅又云天子諸侯皆禘於宗廟非祭天之祭郊祀后稷不稱禘宗廟稱禘禘祫一名也合祭故稱祫禘而審諦之故稱禘非兩祭之名三年一祫五年一禘總而互舉故稱五年再殷祭不言一禘一祫斷可知矣然以祫為一祭王義為長以圓丘為禘與宗廟大祭同名鄭義亦為當今互取鄭王二義禘祫并為一名從王禘是祭圓丘大祭

之名上下同用從鄭永為定式北齊延昌四年正月宣

武帝崩孝明即位三月時議來秋七月應祫祭于太祖

太常卿崔亮上言曰今宣武皇帝主雖入廟然烝嘗時

祭猶別寢室至于祫祭宜存古典按禮三年喪畢祫於

太祖明年春禘于羣廟又按杜元凱云卒哭而除三年

喪畢而禘愚謂來秋七月祫祭應停宜待年終乃後祫

禘從之唐前上元三年有司祫享于太祖廟時議者以

禮緯三年一祫五年一禘公羊傳云五年而再殷祭兩

義互文莫能斷太學博士史元琛議曰按禮記正義列

鄭康成禘祫志云春秋僖公三十三年十二月薨文公

二年八月丁卯大事于太廟公羊傳云大事者何祫也

是三年喪畢新君二年當祫明年春禘于羣廟僖公宣

公八年皆有禘則後禘去前禘五年以此定之則新君

二年祫三年禘自爾之後五年而再殷祭則六年當祫

八年當禘又昭公十年齊歸薨至十三年喪畢當祫為

平丘之會冬公如齊至十四年祫十五年禘傳云有事

武宮是也至十八年禘二十年禘二十三年禘二十五年禘昭公二十五年有事于襄宮是也如上所云則禘後隔三年禘以後隔二年禘此則有合禮經不違傳義自此禘祫之祭依璨議

臣謹按杜佑議曰聖人制禮合諸天道使不數不怠故有四時之制焉而又設殷祭者因天道之成以申孝順之心用盡事終之禮禘祫二禮俱是大祭先賢所釋義各有殊馬融王肅皆云禘大祫小鄭康成注

二禮以禘大禘小賈逵劉歆則云一祭二名禮無差
降數家之說非無典據至於宣通經訓鄭義為長誠
以禮經及春秋所書皆禘大於禘按春秋公羊傳云
大事于太廟大事者禘也禘者毀廟之主陳於太祖
未毀廟之主皆升合食于太祖至於禘則云禘于莊
公禘于僖公既不於太祖則小於禘也又逸禮記禘
于太廟之禮云毀廟之主皆升合食而立二尸又按
韓詩內傳云禘取毀廟之主皆升合食於太祖則禘

小於祫也祫則羣廟之主悉升於太祖廟禘者各於其廟而行祭禮二祭俱及毀主禘之時文王以上毀主自在后稷廟而祭文王以下毀主自在二祧之廟而祭禘則小於祫而大於四時也曾子問主夫子云自非祫祭七廟五廟無虛主而不言禘小於祫明矣其祫備五齊三酒禘惟四齊三酒祫則備六代之樂禘則四代而下又無降神之樂以示其闕也

功臣配享

盤庚云茲予大享于先王爾祖其從與享之周制凡有
功者銘書于王之太常祭于大烝司勳詔之漢制祭功
臣於庭生時侍燕於堂死則降在庭位與士庶為例魏
高堂隆議曰按先典祭祀之禮皆依生前尊卑之序以
為位次功臣配食於先王像生時侍讌燕禮大夫以上
皆升堂以下則位於庭其餘則與君同牢至於俎豆薦
羞惟君備公降於君卿大夫降於公士降於大夫使功
臣配食於烝祭所以尊崇其德明其勲以勸嗣臣也議

者欲從漢氏祭之於庭此為貶損非寵異之位也貴者
取貴骨賤者取賤骨今使配食者因君之牢以貴賤為
俎庶合事宜周制曰勇則害上不登於明堂共用謂之
勇言有勇而無義死不登堂而配食此則配食之義位
在堂之明審也下為北面三公朝立之位耳燕則脫屨
升堂不在庭也晉散騎常侍任茂議按魏功臣配食禮
叙六功之勲祭陳五祀之品或祀之於一代或傳之於
百代蓋社稷五祀所謂傳之於百代者古之王臣有明

德大功若勾龍之能平水土柱之能樹百穀則祀社稷
異代不廢也昔湯既勝夏欲遷其社不可乃遷稷周棄
德可代柱而勾龍不廢也若四序之屬分主五方則祀
為貴神傳之異代載之春秋非此之類則雖明如咎繇
勲如伊尹功如呂尚各於當代祀之不祭於異代也然
則伊尹於商雖有王功之茂不配食於周之清廟以今
之功臣論其勲績比咎繇伊尹呂尚猶或未及凡云配
食各配食於主也今主遷廟臣宜從饗大司馬石苞等

議魏代功臣宜歸之陳留國使脩常祀允合事宜唐貞觀十六年有司言禮功臣配享於廟庭禘享則不配依令禘祫之日功臣並得配享請集禮官學士等議太常卿韋挺等議曰古者臣有大功享祿其後子孫率禮潔粢豐盛禘祠烝嘗四時不輟國家大祫又得配享焉所以昭明其勲尊崇其德以勸嗣臣也其禘及時享功臣皆不應享故周禮六功之官皆配大烝而已先儒皆以大烝為祫祭梁初誤禘功臣左丞何佟之駁議武帝允

而依行降暨周齊俱遵此義禮禘無配功臣理不可易從之其儀具開元禮

天子七祀 諸侯附

商制天子祭五祀戶一竈二中雷三門四行五也歲徧凡祭五祀於廟門戶主出入竈主飲食中雷主堂室居處行主道路諸侯大夫與天子同

周制王為羣姓立七祀曰司命曰中雷曰國門曰國行曰泰厲曰戶曰竈諸侯為國立五祀曰司命曰中雷曰國門曰國行曰公厲大夫立三祀曰族厲曰門曰行嫡

士立二祀曰門曰行庶人立一祀或立雷竈或立戶漢

立五祀白虎通云戶一祀

春祭

竈二祀

夏祭

門三祀

秋祭

井四

祀冬

中雷五祀

六月祭

歲一徧有司行事禮頗輕於社稷

祭

祭祀天子諸侯以牛因四時祭物也祀戶以牛竈以雞

中雷以牛門以犬井以豕或曰中雷用牛不得用牛者

用豕井後漢建武初有五祀之祭門戶井竈中雷也有

司掌之其祀簡於社稷矣人家祀山神門戶

山即厲也鬼有歸所

乃不為厲魏武王始定天下興復舊祀而造祭五祀門戶井

竈中雷也晉傳玄云帝之都城宜祭一門正宮亦祭一

門正室祭一戶井竈及中雷各擇其正者祭之以後諸
祀無聞惟司命配享於南郊壇隋制其司命戶以春竈
以夏門以秋行以冬各於享廟日中雷則以季夏祀黃
郊日各命有司祭於廟西門道南牲以少牢唐初廢七
祀惟季夏祀祭中雷開元中制禮祭七祀各因時享祭
之於廟庭司命戶以春竈以夏門厲以秋行以冬中雷
以季夏其儀具開元禮

上陵拜掃及諸節上食附

三代以前無墓祭至秦始皇出寢起於墓側漢因秦上陵皆有園寢故稱寢殿起居衣服象生人之具古寢之意也後漢都雒陽以關西諸陵久遠但四時特牲祀每帝

西幸即親謁其雒陽陵每正月上丁郊廟畢以次上陵

百官四姓親家婦女公主諸王大夫

袁宏漢紀曰明帝永平元年為外戚

樊氏郭氏陰氏馬氏諸子弟立學號曰四姓小侯獨斷曰凡與先后有瓜葛者

外國朝者侍子

郡國計吏會陵晝漏上水大鴻臚設九賓隨立寢殿前

薛琮曰九賓謂王侯公卿二千石六百石下及郎吏匈奴侍子共九等也

鐘鳴謁者引客羣

臣就位如儀乘輿自東廂下太常導出西向拜止旋升于階拜神座退後公卿羣臣謁神座太官上食太常樂奏食舉舞文始五行之舞

文始舞者本舜韶舞也高祖更名文始以示不相亂也五行舞者本周舞也秦始

禮樂闕羣臣受賜食畢郡國上

皇更名五行之舞也

計吏以次前當神軒告其郡穀價民所疾苦欲神知其動靜孝子事親盡敬愛之心也最後親陵遣計吏賜之帶珮八月飲酎上陵禮亦如之靈帝以晦朔二十四氣伏臘及四時祠廟日於陵所上飯宮人隨鼓漏理被枕

盟水陳嚴具魏文帝詔曰先帝躬履節儉遺詔省約子

以述父為孝臣以繫事為忠古不墓祭皆設於廟先帝

高平陵上殿皆毀壞車馬還廐衣服藏府以從先帝儉

德之志遂革上陵之禮文帝自作終制又曰壽陵無立

寢殿造園邑自後園邑寢殿遂絕及齊王在位九載始

一謁高平陵晉宣王遺令子弟羣官皆不得謁陵景文

遵旨至武帝猶再謁崇陽陵景帝陵一謁峻平陵文帝陵然

遂不敢謁高原陵宣帝陵至惠帝復止也東晉元帝崩後

諸公始有謁陵之事蓋由眷同友執率情而舉也成帝時中宮亦年年拜陵議者以為非禮遂止以為定制穆帝幼冲褚太后臨朝又拜陵至孝武崩驃騎將軍會稽王道子曰今雖權制釋服至於朔望諸節自應展情陵所以一周為斷於是至陵變服單衣煩瀆無准非禮也及安帝元興元年左僕射桓謙奏百僚拜陵起於中興非晉舊典積習生常遂為近法尋武帝詔乃不使人主諸王拜陵及義熙初又復江左之舊宋文帝每歲正月

謁初寧陵武帝陵孝武明帝亦每歲拜初寧長寧陵文武

後魏太和十六年九月辛未孝文帝哭於文明太后陵

左終日不絕聲素幕越音活席為次侍臣侍哭壬申孝文

又哭如昨帝二日不御食癸酉朝中夕三時哭拜於陵

前夜宿鑒元殿甲戌帝拜哭辭陵還永樂宮唐貞觀十

三年太宗朝于獻陵先設黃麾仗周衛陵寢至質明七

廟子孫及諸侯百僚蕃夷君長皆陪列于司馬門內太

宗至小次降輿納屨哭入闕門西再拜慟絕不能興禮

畢改服入于寢躬親執饌閱視高祖先后服御之物悲
動左右侍御者莫不歔歔禮畢太宗出自寢宮步過司
馬門泥行二百餘步上入寢哭踊絕于地進至東階西
面再拜號慟久之乃進太牢之饌加珍羞具品引太尉
無忌司空績越王貞趙王福曹王明及左屯衛將軍程
知節並入執爵進俎上至神座前拜哭奠饌閱先帝先
后衣服拜辭訖行哭出寢北門乃御小輦還宮高宗永
徽二年有司言謹按獻陵三年之後每朔及月半上食

其冬夏至伏臘清明社等節日亦上食其昭陵請依獻陵故事上從之六年正月謁于昭陵有司先設儀衛於陵寢質明七廟子孫二王後百僚州鎮蕃牧四夷君長等並陪列于位皇帝降輦入次易服出次行哭就位再拜辟踊慟絕禮畢又改服奉謁寢宮其妃嬪公主先於神座左右侍列如平生帝入寢門即哭瞻視幄座踊絕于地進至東階西面再拜號哭乃進牢饌珍羞引三公諸王並入執爵進俎帝至神座前再拜哭自奠饌閱先

帝先后衣服更增感絕拜辭訖行哭出寢北門中宗景
龍中每日奠祭太常博士彭景直上疏曰謹按三禮無
諸陵日祭之事又按禮論譙周祭志云天子之廟始祖
及高祖祖考皆每月朔加薦新以象平生朔食也謂之
月祭二祧之廟時祭無日祭之文又鄭氏注儀禮云月
朔月半猶平常之朝夕也大祥之後即四時焉此則古
者祭皆在廟近代以來始分月朔月半及諸節日祭於
陵寢至後漢陵寢致祭無明文自魏三祖以下不於陵

寢致祭並附於古禮至江左亦不崇園寢及齊梁陳其祭無聞今參詳以為三禮者不刊之書外傳所記不與經合不可依憑其諸陵請准禮停日祭不從詔乾陵宜依舊朝脯進奠昭獻二陵每日一進以為常式舊制每年四季之月常遣使往諸陵起居太常博士唐紹上疏曰自安宅兆禮不祭墓當謂送形而往山陵為幽靜之宮迎精而返宗廟為享薦之室但以仲月命使巡陵鹵簿衣冠禮容必備自天授以後時有起居因循至今乃

為常事起者以起動為稱居者以居止為名敢辭命使
勞繁但恐不安靈域又降誕之日穿針之辰皆以續命
為名時人多有進奉今聖靈日遠仙駕難攀進止起居
恐乖先典請停四季及降誕并節日起居陵使但准式
二時巡陵庶合禮經不從開元二十年四月制曰寒食
上墓禮經無文近代相傳浸以成俗士庶有不合廟享
何以用展孝思宜許上墓同拜掃禮不得作樂仍編入
五禮永為定式二十三年四月勅獻昭乾定橋恭六陵

朔望上食歲冬至寒食日各設一祭如節祭共朔望日
相逢依節祭料橋陵除此日外仍每日進半口羊食天
寶二年七月勅詩著授衣令存休澣在於臣子猶及恩
私恭事園陵未標令式自今以後每至九月一日薦衣
于陵寢貽範千載庶展孝思

臣謹按上陵之禮謝承漢書曰靈帝建寧五年正月
車駕上原陵蔡邕為司徒掾從上行到陵見其儀慨
然謂同座者曰聞古不墓祭朝廷有上陵之禮始為

可損今見其儀察其本意乃知孝明帝至孝惻隱不可易舊或曰本意云何昔京師在長安時其禮不可盡得聞也光武即世始葬于此明帝嗣位踰年羣臣朝正感先帝不復聞見此禮乃率公卿百僚就園陵而創焉尚書階西設神座天子事亡如事存之意也苟先帝有瓜葛之屬男女畢會王侯大夫郡國計吏各向神座而言庶幾先帝神魂聞之以明帝聖孝之心親服三年久在園陵初興此儀仰察几筵下顧羣

臣悲切之心必不可堪邕見太傅胡廣曰國家禮有煩而不省者不知先帝之用心周密之至於此也廣曰然子宜載之以示學者邕退而記焉又按飲酎之禮丁孚漢儀曰酎金律文帝所加以正月旦作酒八月成名曰酎酒因令諸侯助祭貢金漢律金布令諸侯列侯各以民口數率千口奉金四兩奇不滿千口至五百口亦四兩皆會酎少府受又九真交趾日南者用犀角二長九寸以上若玳瑁甲一鬱林用象牙

長三尺以上若翡翠各二十准以當金漢舊儀曰皇帝於八月耐車駕夕視牲以鑑燧取水於月取火於日為明水火左袒以水沃牛右肩手執鸞刀以切牛毛薦之而即更衣侍中上熟乃祀

釋奠

周禮凡始立學必釋奠于先聖先師及行事必以幣凡學春官釋奠于先師秋冬亦如之

官謂禮樂詩書之官也周禮凡有道者有

德者使教焉死則以為樂祖祭于瞽宗此謂先師之類不言夏從春可知釋奠者設薦饌酌奠而已無迎尸以

下之事

始立學者既釁器用幣

禮樂之器成則釁之又用幣告先聖先師以器成也

然後釋菜

祭菜示敬道也鄭康成曰禮先聖先師也菜芹藻之屬也

天子視學大昕

鼓以警衆也衆至然後天子至乃命有司行事祭先師

先聖焉有司卒事反命天子乃命將出征受命於祖

告祖

也

受成於學

定兵謀也

出征執有罪反釋奠于學以訊馘告

釋菜奠幣禮先師也詩云在類獻馘

魏齊王正始中有講經偏輒使太常

釋奠於辟雍以太牢祠孔子以顏回配晉武帝泰始七

年惠帝元康三年二釋奠皆於太學泰始六年元康五

年二行鄉事皆於辟雍

鄉事鄉飲酒禮也

惠帝愍懷之為太子

皆講經竟並親釋奠於太學東晉明帝之為太子亦行

釋奠禮成穆孝武三帝皆親釋奠惟成帝在辟雍自是

一時制也孝武以太學在水南懸遠有司議依穆帝升

平元年於中堂權立行太學釋奠禮畢會百官六品以

上有司奏應須二學生百二十人太學生取見人六十而無國子生權銓大臣子孫六十人事訖罷之宋

文帝元嘉二十二年太子釋奠採晉故事

裴松之議應舞六佾宜設

軒懸之樂牲牢器用悉依上公

祭畢臨學宴會太子以下悉在齊武帝

永明三年有司奏宋元嘉舊事學生到先釋奠先聖先
師禮又有釋菜未詳今當行何禮用何樂及禮器時從
喻希議用元嘉故事設軒懸之樂六佾之舞牲牢器用
悉依上公梁武帝天監八年皇太子釋奠周捨議既唯
大禮請依東宮元會太子著絳紗褱音博衣領也樂用軒懸
合升殿坐者皆服朱衣帝從之又有司以為禮云凡為
人子者升降不由阼階吏部郎中徐勉議鄭玄云由命
士以上父子異宮宮室既異無不由阼階之禮請釋奠

及宴會太子升堂並宜由東階若輿駕幸學自然中階
其會賓客依舊西階大同七年皇太子表其子寧國臨
城公入學時議者以與太子有齒胄之議疑之臣纘等
以為參點回路並事宣父鄒魯稱盛洙汶無譏制可北
齊將講於天子先定經於孔子廟講畢以一太牢釋奠
孔宣父配以顏回列軒懸樂六佾舞皇太子每通一經
及新立學必釋奠禮先聖先師每歲春秋二仲常行其
禮每月朔祭酒領博士以下及國子諸學生以上太學

四門博士升堂助教以下太學諸生階下拜孔子揖顏

回日出行事其郡學則於坊內立孔顏廟博士以下亦

每月朝隋制國子寺每歲四仲月上丁釋奠於先聖先

師年別一行鄉飲酒禮

州縣學則以春秋仲月釋奠亦每年於學一行鄉飲酒禮唐

武德二年於國子學立周公孔子廟各一所四時致祭

貞觀二十一年制左丘明以下二十二人同享

初以儒官自為祭主直云博士

姓名昭告於先聖又州縣釋奠亦博士為主許敬宗奏

曰秦漢釋奠無文魏氏則太常行事自晉宋以降時有

親行而學官為主全無典實在於臣下理不合專令請國學釋奠令國子祭酒為初獻詞稱皇帝謹遣仍令司業為亞獻博士為終獻其州學刺史為初獻上佐為亞獻博士為終獻縣學令為初獻丞為亞獻主簿及尉通為終獻循附禮令以為永制景龍二年七月皇太子將親釋奠於國學有司草儀注令從臣皆乘馬著衣冠太子左庶子劉知幾進議曰古者自大夫以上皆乘車而以馬為駢服魏晉以降迄于隋氏朝士又駕牛車至如

李廣北征解鞍憩息馬援南征據鞍顧盼斯則鞍馬之
設行於軍旅戎服所乘貴於便習者也按江左官至尚
書郎而輒輕乘馬則為御史所彈又顏延年罷官後好
騎馬出入閭里當時稱其放誕此則專車憑軾可擐朝
衣單馬御鞍宜從褻服求之近古灼然之明驗也褻衣
博帶方履高冠本非馬上所施自是車中之服且長裙
廣袖襜如翼如鳴佩紆組鏘鏘奕奕馳驟於風塵之內
出入於旌葆之間倘馬有驚逸人從顛墜遂使屬車之

右遺屨不收清道之傍絙驂相續因以受嗤行路有損
威儀其乘馬衣冠竊謂宜從廢改皇太子令付外宣行
仍編入令以為常式開元十一年詔春秋釋奠用牲牢
其屬縣用酒脯而已二十七年八月因釋奠文宣王始
用宮懸之樂二十八年二月勅文宣王廟春秋釋奠宜
令攝三公行禮著之常式國子祭酒劉瑗奏准故事釋
奠之日羣官道俗等皆合赴監觀禮請依故事著之常
式制可其儀具開元禮

祀先代帝王 名臣附

漢武帝時有人言古者天子以春解祠祠黃帝用一梟

破鏡

方士云以歲始祓除凶災令神仙之帝食惡逆之物使天下為逆者破滅梟名食母破鏡名食父如

羆而虎眼黃帝欲窮其類使百吏祠皆用焉漢使東郡送梟五月五日作羹以賜百官解祠者解罪求福也

後漢章帝元和春東巡狩使使者奉一太牢祠帝堯於

濟陰魏武帝少時漢太尉橋元獨先禮異焉故建安中

遣使祠以太牢東晉孝武帝寧康三年七月故事祀梟

陶於廷尉寺新禮移祀于律署以同祭先聖於太學舊

祀以社日新改用孟秋以應秋政後魏文成帝東巡歷
橋山祀黃帝孝文太和十六年詔曰法施於人祀有明
典立功垂惠祭有常式其孟春應祀者頃以事殷遂及
今日可令以仲月而饗祀焉凡在祀令者有五帝堯樹
則天之功興巍巍之治可祀于平陽舜播太平之風致
無為之化可祀於廣甯禹禦洪水之災建天下之利可
祀於安邑周文公制禮作樂垂範萬葉可祀於洛陽其
宣尼廟已於中省別勅有司行事自文公以上可令當

界牧守各隨所近攝行祀事皆用清酌尹祭也

曲禮曰
脯曰尹

祭

隋制使祀先代王公帝堯於平陽以契配帝舜於河
東咎繇配夏禹於安邑伯益配商湯於汾陰伊尹配文
王武王於澧渭之郊周公召公配漢帝於長陵蕭何配
各以一太牢而無樂配者饗于廟庭唐前脩禮令無祭
先代帝王之文禮部尚書許敬宗等奏謹按禮記祭法
云聖王之制祭祀也法施於人以死勤事以勞定國能
禦大災能捍大患則祀之始皇無道所以棄之漢祖典

章法垂於後自隋以上亦在祠列今請聿遵故實三年一祭以仲春之月天寶六載正月制三皇置一廟五帝置一廟有司以時祭享至七載五月詔三皇以前帝王宜於京城內共置一廟仍與三皇五帝廟相近以時致祭天皇氏地皇氏人皇氏有巢氏燧人氏其祭料及樂請准三皇五帝廟以春秋二時享祭歷代帝王肇跡之處未有祠宇者所由郡置一廟享祭仍以當時將相德業可稱者二人配享

老君祠 先賢附

後漢延熹八年使中常侍之陳國苦縣祠老子九年親祠老子於濯龍中文廟為壇飾純金釳器設華蓋座用郊天樂唐乾封元年追號老君為太上玄元皇帝文明元年九月冊老君妻為先天太皇太立尊像于老君廟所開元二年三月親祠玄元皇帝廟追尊玄元皇帝父周上御史大夫敬為先天太皇仍於譙郡置廟歲餘一祀以上准先天太后廟例二十九年兩京及諸州各置廟

一所并置崇元館天寶元年親祠玄元廟又於古今人

表升玄元皇帝為上聖

時同制莊子號南華真人文子號通玄真人列子號沖虛真人

庚桑子號洞靈真人又以其所著之書並為經

其年九月改兩京玄元廟為太

上玄元皇帝宮二載西京改為太清宮東京改為太微

宮天下諸郡為紫極宮祝版改為清詞於紙上十三載

正月令有司每至孟月則修薦獻上香之禮仍為常式

七載五月詔修漢張天師冊贈太師梁貞白陶先生冊贈太保貞元元年正月勅薦享

太清宮亞獻太常卿充終獻光祿卿充仍永為常式

孔子祠 先儒附

漢元帝時孔霸以帝師賜爵號褒成君奉孔子後平帝
元始初追諡孔子曰褒成宣尼公追封孔均為褒成侯
後漢光武建武十三年封均子志為褒成侯章帝元和
二年二月東巡狩因幸魯祠孔子七十二弟子

漢晉春秋曰闕

里者仲尼之故宅也在魯城中帝升廟西面羣臣中庭北面皆再拜帝進爵而後坐東觀書曰祀禮畢命儒者
也 論難
和帝永元四年徙封為褒尊侯相傳至獻帝初國

絕魏文帝黃初二年以孔子二十一代孫議郎羨為宗

聖侯邑百戶奉孔子祠令魯郡修舊廟置百戶吏卒守
衛晉武帝泰始三年改封孔子二十三代孫宗聖侯震
為奉聖亭侯又詔大學及魯國四時備三牲以祀孔子
明帝太寧三年詔給奉聖亭侯四時祀孔子祭宜如泰
始故事宋文帝元嘉八年奉聖侯有罪奪爵至十九年
又授孔隱之隱之兄子熙先謀逆又失爵二十八年更
以孔惠雲為奉聖侯後有重疾失爵孝武大明二年以
孔邁為奉聖侯邁卒子季誦俱反嗣有罪失爵後魏封孔

子二十七葉孫乘為崇聖大夫孝文帝太和十九年改封二十八葉孫珍為崇聖侯文成帝詔其宣尼之廟當別勅有司行薦饗之禮北齊改封三十一葉孫為恭聖侯後周武帝平齊改封鄒國公隋文帝仍舊封鄒國公煬帝改為紹聖侯唐貞觀十一年封孔子裔德倫為褒聖侯二十一年制曰左丘明卜子夏公羊高穀梁赤伏勝高堂生戴聖毛萇孔安國劉向鄭衆杜子春馬融盧植鄭康成服虔何休王肅王弼杜預范甯賈逵總二十

二人並為先師永徽中制令改周公為先聖黜夫子為

先師顏回左丘明從祀

顯慶二年禮部尚書許敬宗等奏曰准貞觀二十一年詔以孔

子為先聖更添左丘明等二十二人與顏子俱配宣父於太學並為先師今據永徽令改周公為先聖黜孔子為先師顏回左丘明並為從祀按禮記凡學春官釋奠于先師鄭康成注曰官謂詩書禮樂之官也先師者若禮有高堂生樂有制氏詩有毛公書有伏生可以為之又曰始立學釋奠于先聖鄭注曰若周公孔子也聖則非周即孔師則偏善一經漢魏以來取捨各異顏回夫子互作先師宣父周公更為先聖求其節文互有得失所以貞觀之制正夫子為先聖加衆儒為先師而今新令輒事刊改但周公攝政制禮作樂功比王者祀之儒館實貶其功仲尼生哀周之末拯文喪之弊祖述堯舜憲章文武宏聖教於六經闡儒風於千載故孟軻稱生

民以來一人而已自漢以降奕葉繼侯崇奉其聖迄于今日胡可降茲先哲俯入先師且又丘明之徒見行其學貶為從祀亦無故事今請改令從詔於義為允其周公仍依舊禮配享武王也

高宗乾封元

年正月東巡次兗州鄒縣頓祭宣父廟贈太師總章元年二月皇太子詣學贈顏回太子少師曾參太子少保神龍初詔以鄒魯百戶封崇道公宣尼采邑用供薦享又授裔孫褒聖侯崇階朝散大夫仍許子孫以相傳襲開元八年勅改顏子等十哲為坐像悉應從祀曾參大孝德冠同列特為塑像坐於十哲之次圖畫七十子及

二十二賢於廟壁上以顏子亞聖親為之贊以書于后

閔損以下令當朝文士分為之贊

時國子司業李元瓘奏稱先聖孔宣父廟

先師顏子配坐今其像立侍配享合坐十哲弟子雖復列像廟堂不應享祀謹檢祠令何休范甯等二十二賢猶需從祀其十哲請春秋釋奠列享在二十二賢之上七十子請圖形于壁兼為立贊又曾參孝道可崇獨受經於夫子請准 二十二賢應饗 二十七年八月制夫子追贈諡為文宣

王宜令三公持節冊命並撰儀注昔緣周公南面夫子西坐今位既有別坐豈仍舊宜補其墜典永作常式自今以後夫子南面而坐內出王者袞冕之服以衣之十

哲等東西列侍顏淵既云亞聖須優其秩

顏子淵贈克國公

閔子騫贈費侯

冉伯牛贈鄆侯

冉仲弓贈薛侯

宰子我贈齊侯

端木子貢贈黎侯

冉子有贈徐侯

仲子路贈衛侯

言子游贈吳侯

卜子夏贈魏侯

又夫子格言參也稱魯雖居七十之數不載四科之目

頃雖參於十哲終未殊于等倫久稽先旨俾修舊位庶

乎禮得其序人焉式瞻命尚書右丞相裴耀卿攝太尉
持節就國子廟冊冊畢所司奠祭亦如釋奠之禮又遣
太子少保崔琳往東都就廟行冊禮又勅兩京及兗州
舊宅廟像宜改服衮冕其諸郡及縣廟宇既小但移南
面不須改衣服兩京樂用宮懸春秋二仲上丁令三公
攝行事七十子並宜追贈

曾參贈郕伯

顓孫師贈陳伯

澹臺滅明贈江伯

宓子賤贈單伯

原憲贈原伯

公冶長贈莒伯

南宮子容贈郊伯

公皙哀贈卬伯

曾點贈宿伯

顏路贈杞伯

商瞿贈蒙伯

高柴贈共伯

漆雕開贈滕伯

公伯寮贈任伯

司馬牛贈向伯

樊遲贈樊伯

有若贈卞伯

公西赤贈郈伯

巫馬期贈鄆伯

梁鱣贈梁伯

顏柳贈蕭伯

冉孺贈紀伯

曹卹贈曹伯

伯虔贈聊伯

公孫龍贈黃伯

冉季贈東平伯

秦子南贈少梁伯

漆雕子斂贈武城伯

顏子驕贈瑯邪伯

漆雕徒父贈須句伯

壤駟赤贈北徵伯

商澤贈睢陽伯

石作蜀贈石邑伯

任不齊贈任城伯

公夏首贈亢父伯

公良孺贈東牟伯

后處贈營丘伯

秦子開贈彭衙伯

奚容箴贈下邳伯

公肩定贈新田伯

顏襄贈臨沂伯

鄒單贈銅鞮伯

句井疆贈淇陽伯

罕父黑贈乘丘伯

秦商贈上洛伯

申黨贈邵陵伯

公祖子之贈期思伯

榮子祺贈雩婁伯

縣成贈鉅野伯

左人郢贈臨淄伯

燕伋贈漁陽伯

鄭子徒贈滎陽伯

顏之僕贈東武伯

原亢籍贈萊蕪伯

樂欬贈昌平伯

廉絜贈莒父伯

顏何贈開陽伯

叔仲會贈瑕丘伯

狄黑贈臨濟伯

邾異贈平陸伯

公西輿如贈崇丘伯

公西歲贈祝阿伯

孔忠贈汶陽伯

蘧瑗贈衛伯

施恒贈乘氏伯

林放贈清河伯

秦非贈汧陽伯

陳亢贈潁伯

申棖贈魯伯

琴牢贈南陵伯

顏噲贈朱虛伯

琴張贈南陵伯

今考琴牢即琴張疑重出

步叔乘贈淳于伯

太公廟

唐開元十九年四月兩京及天下諸州各置太公廟一所以張良配享春秋取仲月上戊日祭每出師命將就廟引辭仍簡取自古名將功成業著宏濟生人者十人准十哲例霑享至乾元元年九月十二日太常少卿于

休烈奏臣昨因秋享漢高祖廟見旁無侍臣享太公廟
有張良在側良實漢佐命請移配享於漢祖廟從之上
元元年追封太公望為武成王依文宣王置廟仍擇古
今名將准文宣王置亞聖及十哲等享祭之奠一同文
宣王

巡狩

唐虞五載一巡狩歲二月東巡狩至于岱宗柴望秩于
山川羣后四朝肆覲東后協時月正日同律度量衡修

五禮五玉三帛二生一死贄五月南巡狩至于南嶽八月西巡狩至于西嶽十有一月北巡狩至于北嶽皆如
岱宗之禮歸格于藝祖用特夏后氏因之周制十二年
一巡狩天子將巡狩類于上帝宜乎社造乎禰乘金輅
建大旂歲二月東巡狩至于岱宗柴望祀于山川而覲
諸侯其方之諸侯先于境首待之所過山川則使祀宗
先以三等璋瓚皆以黃金為勺酌鬱鬯以禮神次乃校
人殺黃駒以祭之既至方嶽先問百年就見之若八十

九十者路經其門則見之不然則不天子乃令太師採
民之歌謠以樂播而陳之以觀風俗以審善惡令典市
之官陳百物之貴賤以觀民之好惡又命典禮之官考
校四時節氣月之晦朔甲乙等日及候氣之律呂所用
禮樂宮室車旗等制度君臣上下之衣服皆以王者所
頒制度考校之諸侯封內有名山大川不舉而祭之者
為不敬削其地有祭宗廟不順昭穆者為不孝絀其爵
變禮易樂者為不從其君流革制度衣服者為畔其君

討有功德於民者加地進律其諸侯待王之牢禮以一
犢既黜陟諸侯乃與之相見方嶽之下築壇與覲禮壇
制同其壇外為土埒方三百步謂之宮開四門壇方九
丈六尺高四尺上為堂下為三等謂之三成成每等高
一尺其堂上掌司盟之神位謂之方明諸侯之上介各
以其君之旂置於宮內以表立位之處詔王升壇訖諸
侯皆就其旂而立其位鄭氏按明堂位云諸公中階之
前北面東上諸侯阼階之東西面北上諸伯西階之西

東面北上諸子門東北面西上諸男門西北面東上王
乃於壇上揖之以定其位諸侯乃進升壇奠玉公於上
等奠桓圭侯伯於中等奠信圭躬圭子男於下等奠穀
璧蒲璧諸侯各奠玉訖降拜又升成拜訖儻者乃延諸
侯升堂授王玉訖乃以璧琮行享禮謂之將幣

玉人云
璧琮九

寸諸侯以享
天子是也

諸侯既朝見王訖乃退而自相與盟王宮

之伯臨之其五月南巡狩至于南嶽如東巡狩之禮八
月西巡狩至于西嶽如南巡狩之禮十有一月北巡狩

至于北嶽如西巡狩之禮巡狩訖却歸每廟用一牛以

告至謂之歸格于祖禰用特秦始皇三年東巡狩郡縣

祠鄒嶧山頌功業

其年復遊海上三年遊碣石從上郡歸五年始南至湘山遂登會稽並海

到沙丘崩此求神仙奇藥之術無復觀民風問百年也並步浪反下同

二世元年東巡碣

石並海南歷泰山至會稽皆禮祠之而勒始皇所立石

書旁以彰始皇之功德漢武帝元狩四年始巡郡縣寤

尋于泰山元封初復至海上又北至碣石又自遼西歷

北邊至九原五月乃至甘泉周萬八千里

武帝亦如秦始皇之事

後漢光武建武三十年三月幸魯

漢祀令曰天子行有所之至河沈白馬珪

璧各一衣以繒緹五尺祠用脯二束酒六升鹽一升涉渭霸涇洛他名水如此者沉珪璧各一律在所給祠具及行沉祠他川水先驅投石少府給璧珪不滿百里者不沉過泰山祭泰山及梁父

章帝元和二年二月東巡狩使使者奉一太牢祠帝堯

於濟陰成陽靈臺至泰山辛未柴祭天地羣神如故事

壬申宗祀五帝於孝武所作汶上明堂光武配卒事遂

覲東后饗賜王侯羣臣因行郡國幸魯祠東海恭王孔

子七十二弟子四月還京師庚申告至祠高祖光武廟

各一特牛安帝延光三年東巡狩至泰山柴祭及祠汶上明堂如元和中故事魏明帝凡三東巡狩所過存問

高年恤疾苦或賜穀帛有古巡幸之風焉齊王正始中

巡洛陽縣賜高年力田各有等差晉初新禮巡狩方嶽

柴望告至設壇宮如禮諸侯之覲者儗及執贄皆如朝

儀而不建旂

摯虞以覲禮諸侯各建其旂章所以殊爵命示等威詩稱君子至止言觀其旂宜定

新禮建旂如舊禮詔可其議然終晉代其禮不行武帝泰始四年詔使使持節侍中黃門侍郎銜命四出周行天下其萬民之利害為一書禮俗政事教理刑禁逆順為一書悖逆暴亂作慝犯令為一書札傷荒凶厄貧為

一書康樂和親安平為一書
每國辨異之以反命于王

宋文帝元嘉四年二月東

巡狩至于丹徒告觀園陵三月饗會父老舊勲於行宮
加賜衣裳幣帛蠲租原刑戰亡之家及單孤隨宜隱卹
二十六年二月東巡幸至京城并謁二陵會舊京故老
萬餘人饗勞賚發赦蠲徭役後魏文成帝和平元年正
月東巡狩歷橋山祀黃帝遼西遙祀醫無閭山遂緣海
幸冀州北至中山過恒嶽禮其神而返明年南巡過石
門遣使者用玉璧牲牢禮恒嶽隋煬帝自文帝山陵纔

畢即事巡遊乃慕始皇漢武之事西征東幸無時暫息
六宮與文武吏士常十萬餘人然非省方展義之行也
唐皇帝將巡狩所司承制先頒告于東方諸州曰皇帝
二月東巡狩各修平乃守考乃職事駕將發告圜丘宗
廟社稷皆如開元禮高宗調露元年九月幸并州令度
支郎中秋仁傑為知頓使并州長
使李知元以道出妬女祠俗云盛衣服過者必致風雷
之變遂發數萬人別開御道仁傑曰天子之行千乘萬
騎風伯清塵雨師灑道何妬女之害
遽令罷之上聞之歎曰真大丈夫也

封禪

古者帝王之興每易姓而起以致太平必封乎泰山所

以告成功也禮云因名山升中于天

封禪必于泰山者萬物交代之處封

增其高順其類也升上也中成也刻石紀號著功績

封訖而禪梁父亦以告太平

也封禪者高厚之道也封土於山而禪祭于地天以高

為尊地以厚為德增泰山之高以報天厚梁父之階以報地梁父者泰山之支山卑下者也能以

無懷氏封

其道配成高德故禪梁父亦以告太平也

泰山禪云云管仲對齊桓公曰古者封泰山禪梁父者七十二家而夷吾所記者十有二焉韓詩

外傳曰孔子升泰山觀易姓而王可得而數者七十餘氏不可得而數者萬數袁准正論曰惟周官有王大封之文按成王封禪而文武皆不在七十二君而無一言見于經傳學者疑焉晉灼曰云云山在蒙陰縣故城北

東下有伏羲神農並因之黃帝禪亭亭

晉灼曰漢地理志鉅平有亭亭

山顓帝帝嚳堯舜復禪云云禹禪會稽湯依禪云云其

所封皆於泰山也周成王封泰山禪社首

社首山晉灼曰在鉅平十

二其儀不存

襄王時齊桓公既霸會諸侯于葵丘而欲封禪謂管仲曰寡人兵車之會三而乘車

之會六九合諸侯一匡天下諸侯莫違我昔三代受命亦何以異於是管仲觀桓公不可窮以辭因說之以事

曰古之封禪必鄒上之黍北里之禾所以為盛江淮之間一茅三脊所以為籍也東海致比目之魚西海致比

翼之鳥然後物有不召而自至者十有五焉今鳳凰麒麟不至嘉禾不生而欲封禪無乃不可乎於是桓公乃

止秦始皇平天下二年東巡郡縣祠鄒嶧山紀秦功業

於是召齊魯儒生七十人至于泰山下諸儒或議曰古

者封禪為蒲車惡傷山之土石草木埽地祭席用菹秸

音戛禾藁也去其皮以為席

言其易遵也始皇聞此議各乖異難施

用由此黜儒生而遂除車道上自泰山陽至巔立石頌

德文曰事天以禮立身以義事父以孝成人以仁四守

之內莫不郡縣四屬八蠻咸來貢職民庶蕃息天祿永

得刻石改號

文出晉太康郡國志

有金冊石函金泥玉檢之事焉

從陰道下禪梁父其禮頗采泰祝之祀雍上帝所用封

藏而皆祕之固不得而記之

封禪之後十一歲秦亡諸生疾秦焚詩書戮文學皆

偽曰始皇上太山為風雨所擊不得封禪

漢武帝立二十八年元鼎中汾得

寶鼎遂議封禪而羣儒不能知其儀又牽拘於詩書古

文於是帝盡罷諸儒用方士言以三月東上泰山立石

泰山之巔石高三丈一尺方博皆三尺壇及墀皆廣長

十二丈增高三尺帝因東至海上四月還至奉高

晉太康郡

國志曰奉高戶千五百六戶此為奉高者以祀東嶽帝王禪代之處是以殊之也故有明堂在縣西南四里又

有奉高宮又至梁父禮祠地主乙卯令侍中儒者皮弁薦紳

射牛行事封泰山下東方如郊祀太一之禮封廣丈二

尺高九尺其下則有玉牒書書祕禮畢天子獨與侍中

奉車子侯

霍去病子也

上泰山亦有封其事皆禁明日下陰

道丙辰禪泰山下趾東北肅然山

晉太康郡國志曰漢武封泰山禪梁父參

諸家所說宜肅然為定也

如祭后土禮天子皆親拜見衣尚黃而盡

用樂焉江淮間一茅三脊為神籍五色土益雜封縱遠

方奇獸蜚禽及白雉諸物頗以加禮兕牛犀象之屬不

用皆至泰山然後去封禪祠其夜若有光晝有白雲起

封中天子從禪還坐明堂羣臣更上壽改元為元封

時作

明堂汶上太史公曰其封禪之禮則有司存而漢史不得其制後漢光武建武三十年

羣臣上言宜封禪泰山詔書曰即位三十年百姓怨氣滿腹吾誰欺欺天乎三月帝幸魯祭泰山及梁父三十

二年詔梁松按索河雒讖文言九世封禪事者松等列

奏乃許焉

東觀書曰羣臣奏言登封告成為民報德百王所同陛下輒拒絕不許臣下不敢頌功述

德業求元封時故事議封禪所施用有司奏當用方石再

累置壇中皆方五尺厚一尺用玉牒書藏方石牒厚五

寸長尺三寸廣五寸有玉檢又用石檢十枚列於石傍
東西各三南北各二皆長三尺廣一尺厚七寸檢中刻
三處深四寸方五寸有蓋檢用金縷五周以水銀和金
以為泥玉璽二其一方一寸二分其一方三寸方石四
角又有距石皆再累枚長一丈厚一尺廣二尺皆在圓
壇上其下用距石十八枚皆高三尺厚一尺廣二尺如
小碑環壇立之去壇三步距石下皆有石跗入地四尺
又用石碑高九尺廣三尺五寸厚尺二寸立壇之丙地

去壇三丈以上以刻書帝以用石功難又欲及二月封

禪故詔梁松欲因故封石空檢更加封而已

欲及二月者書歲二

月東巡狩至于岱宗柴祭山曰燔柴積柴加牲于其上而燔之也

松上疏爭之以為登

封之禮告功皇天垂後無窮以為萬民也承天之敬猶

宜章明奉圖書之瑞尤宜顯著今因舊封竄寄玉牒故

石下恐非重命之義受命中興宜當特異以明天意遂

使泰山郡及魯趣

音促

石工宜取完青石無必五色令印

工刻玉牒書書祕刻方石中命容玉牒二月帝至奉高

遣侍御史與蘭臺令史將工先上山刻石二十二日辛卯晨燎祭天於泰山下南方羣神皆從祀用樂如南郊諸王王者後二公孔子後褒成君皆助祭位事也事畢將升封或曰泰山雖已從食於柴祭今親升告功宜有禮祭于是使謁者以一犧牲於常祠泰山處告祠泰山如親耕疆劉先祠先農先虞故事至食時帝御輦升山日中後到山上更衣早晡時即位于壇北面羣臣以次陳後西上畢位升壇尚書令奉玉牒檢皇帝以寸二分

璽親封之訖太常命人發壇上石尚書令藏玉牒已復

石覆訖尚書令以五寸印封石檢

封禪儀曰以金為繩以石為檢東方西方

各三檢檢中石泥及壇土各如其方色也

事畢皇帝再拜羣臣稱萬歲命人

立所刻石碑乃復道下二十五日甲午禪祭地于梁父

陰以高后配山川羣神從祀如元始中北郊故事

項威曰除

地曰禪後改禪曰禪神之也

四月己卯大赦天下以建武三十二年

為建武中元元年復博奉高靈勿出元年租芻橐以吉

日刻玉牒書函藏金匱璽印封之乙酉使太尉行事以

特牲告至高廟太尉奉匱以告高廟藏于廟室西壁石

室高主室之下

崔靈恩曰自周以前封者皆封土為壇至秦始皇漢武帝始用石檢

魏明

帝時中護軍蔣濟請封禪帝雖拒濟議而實使高堂隆
草封禪儀以天下未一不欲便行大禮會高堂隆卒不
行晉武帝平吳太康元年九月衛瓘議封禪帝曰此盛
德事所未議也瓘等又奏至于再三詔報絕之宋文帝
在位長久有意封禪詔學士山謙之草其儀注屬後魏
師南逼其意乃息孝武大明元年十一月戊申太宰江

夏王義恭表三請帝以文軌未一不從北齊有巡狩之禮并登封之儀終不行隋開皇十四年羣臣請封禪文帝命牛弘等創定其禮帝曰此事體大朕何德以堪之但當東巡因拜岱山耳十五年春行幸兗州遂次岱嶽為壇如南郊又壇外為柴壇飾神廟展宮懸之樂于庭為埋埴二於南門外又陳樂設位於青帝壇如南郊帝服袞冕乘金輅備法駕而行禮畢遂詣青帝壇而祭焉唐貞觀十一年左僕射房元齡等議封禪儀注至高宗

麟德三年正月戊辰朔有事于泰山皇帝親祀昊天上帝

於封祀之壇己巳登于泰山行封禪之禮庚午降禪

於社首山壬申大赦天下改元為乾封武后天冊萬歲

二年臘月甲申登封于嵩山大赦天下改元為萬歲登

封丁亥禪于少室山明皇開元十三年十月封祀于泰

山去山趾五里西去社首山十里丁亥服袞冕于行宮

致齋於供帳前殿己丑大備法駕至山下乃御馬而登

侍臣從帝以靈山清潔不欲多人上乃召禮部學士賀

知章等入講儀注以三獻悉於山上而在一處行其事
五方帝及諸神座於山下壇行事儀注之詳具開元禮

歷代所尚

高陽氏尚赤

以十一月為正

薦玉以赤繒高辛氏尚黑

以十月為正

薦玉以黑繒陶唐氏尚白

以十二月為正

薦玉以白繒有虞氏

尚赤

以十一月為正並出尚書中候

夏后氏尚黑

以建寅月為正

大事斂用昏

戎事乘驪

馬黑色曰驪

牲用玄以黑為徽號

徽謂旌旗也

朝燕服

收冠而黑衣宮室之制屋十寸為尺商人尚白

以建丑月為正

大事斂用日中戎事乘翰

白馬也

牲用白以白為徽號朝

燕服尋冠而縞衣宮室之制屋十二寸為尺周人用赤

以建子月為正

大事斂用日出戎事乘駟

音元馬腹赤

牲用騂以赤

為徽號朝燕服冕冠而玄衣宮室之制屋八寸為尺秦

水德漢書律厯志秦自以水德故十月為歲首漢火德

初亦以十月為歲首及文帝立公孫臣言漢當土德其

應黃龍見丞相張蒼以為漢乃水德河決金堤是其符

也年始冬十月以外黑內赤

十月陰氣在外故黑陽氣尚伏在內故赤

明年

黃龍果見於成紀帝於是令博士諸生申明土德草改
歷服色事至武帝元封七年用倪寬等議改用夏正以
建寅月為歲首劉向以為赤帝斬蛇之符為火德後漢
並同前漢魏土德文帝以建寅月為正服尚黃臘以丑
牲以白節毛當赤節幡當黃郊祀朝會四時之服如漢
制宗廟所服如周禮明帝青龍五年三月用博士秦靜
等議改為景初元年以建丑月為正三年正月帝崩齊
王立以明帝建丑月崩若以其月正朝會設樂不合於

禮於是改以建寅之月為歲首

袁准正論曰自非繼亂不宜改正也

晉金

德武帝泰始二年散騎常侍傅玄上議帝王受命應歷
禪代則不改正朔遭變征伐則改之舜正月上日受終
于文祖無改正之文唐虞正朔皆同明矣至商周革命
乃改魏受漢禪亦已不改至於服色皆從其本惟節幡
用黃大晉以金德王天下順五行三統之序矣詔從之
由是正朔服色並依前代東晉並同西晉宋水德亦如
魏晉故事齊木德餘一依前代梁火德餘一依前代陳

木德餘一依前代後魏初為土德言繼黃帝之後也故
數用五服尚黃犧牲用白至孝文太和十四年用祕書
丞李彪等議承晉後改為水德祖辰臘申北齊木德正
朔服色皆如後魏後周承西魏用水德以文帝誕有玄
氣之祥又有黑水讖故也建寅月為正服色尚黑隋火
德以赤雀降祥之故衣服旗幟犧牲尚赤戎服以黃七
月帝始服黃唐土德建寅月為歲首

武太后永昌元年十一月一日依周

制以建子之月為正改元為載初元年改十一月為正月十二月為臘月來年正月為一月十月建亥為年終

載初元年九月九日改元天授稱周改
皇帝為皇嗣二年正月旗幟尚赤色
天寶九年制應

緣隊仗所用緋色幡等並改為赤黃色天下皆然納崔

昌議以土德承漢火德

享司寒

藏冰開冰附

周制凌人掌冰正歲十有二月令斬冰三其凌

正歲季冬火星

中大寒冰方盛之時也凌冰室也三其凌三倍其冰備消釋也

春始治鑑

鑑如甄大口以盛冰置食

物于中以禦溫氣春而始治之為二月將獻羔而開冰鑑胡暫反甄音直偽反

祭祀供冰鑑賓

客供冰大喪供夷槃冰

尸之槃曰夷槃

夏頒冰掌事

暑氣盛王以冰頒賜

則主秋刷月令仲春天子乃獻羔開冰先薦寢廟

謂立春藏

冰至春分方溫故獻羔以祭司寒而後開冰先薦寢廟而後食之

左傳魯大夫申豐曰

古者日在北陸而藏冰

陸道也夏十二月日在虛危冰堅而藏之

西陸朝覲

而出之

夏三月日在昴畢蟄蟲出而用冰春分之中奎婁在東方

其藏冰也深山窮

谷固陰沍寒用黑牡秬黍以享司寒於是取而藏之也

周其出之也桃弧棘矢以除其灾於是以風出而用之

順春風而散用之

朝之祿位賓客喪祭自命夫命婦至于老疾

冰皆與焉宋孝武帝大明六年立凌室藏冰有司奏季

冬之月冰壯之時凌室長率山虞及輿隸取冰于深山窮谷固陰沍寒之處以納於凌陰務令周密無洩其氣先以黑牡秬黍祭司寒于凌室之北仲春之月春分之日以黑羔秬黍祭司寒啟冰室先薦寢廟凌室在樂遊苑內置長一人吏一人保舉吏二人隋以季冬藏冰仲春開冰並因用黑牡秬黍于冰室祭司寒神開冰依以桃弧棘矢唐制先立春三日因用黑牡秬黍祭司寒之神於冰室祭訖鑿冰千段方三尺厚尺五寸而藏之仲

春開冰祭如藏禮依以桃弧棘矢設於冰室戶內之右
禮畢遂留之餘具開元禮

禋

周制春官大祝掌六祈其四曰禋祭法云幽禋祭星也
雩禋祭水旱也漢制謂禋為請晴服赤幘朱衣晉武帝
咸寧及太康中時雨多則禋祭赤幘朱衣閉諸陰朱絲
縈社伐朱鼓焉梁制霖雨祈晴亦如雩禮隋制霖雨則
縈京城諸門三禋不止則祈山川嶽鎮海瀆社稷又不

止則祈宗廟神州報以太牢州郡縣苦雨亦各崇其城
門不止則祈界山川社稷報用羊豕唐因之崇門不止乃祈山川
嶽鎮海瀆三日不止祈社稷宗廟並用酒脯國城門用少牢

葦茭桃梗禳祠

夏后氏金行初作葦茭言氣所交也呂氏春秋曰始得伊尹被之於廟薰

以葦茭茭者交易陰陽代興之義也商人水德以螺首慎其閉塞使如螺

也周人木德以桃為梗漢制厲殃祀天地日月星辰四
時陰陽之神以師曠配之其壇常祀以禳灾兼用三代

之儀以葦茭桃梗五月五日朱索五色印為門戶飾以
儼止惡氣後漢仲夏之月萬物方盛日夏至陰氣萌作
恐物不懾其禮以朱索連葦茭彌牟朴蠱鍾以桃印長
六寸方三寸五色書文如法以施門戶魏明帝大脩禳
禮故何晏禳祭儀雞特牲供禳釁之事磔雞起于魏末
詳改仲夏在歲旦之所起耳晉依魏制每歲朝設葦茭
桃梗磔雞於宮及百寺之門以辟惡氣泰始二年有司
奏春分祀厲殃及禳祠詔曰不在祀典除之宋皆省其

禮而郡縣往往猶存

高禘

周制月令仲春玄鳥至之日以太牢祠于高禘

高辛氏之世玄

鳥遺卵娥簡吞之生契後王

天子親往后妃帥九嬪御

乃禮天子所御帶以弓韉授以弓矢于高禘之前

天子所御謂今

有娠者禮謂酌飲于高禘之庭帶以弓韉求男之祥

漢武帝年二十九乃得太子

甚喜始立為高禘之祠於城南祭以特牲

晉博士束皙云漢武帝晚

得太子始為立高禘之祠立石為主祀以太牢也

後漢因之祀于仲春之月晉

以仲春之月高禘祀于城南祀以特牲惠帝元康六年

高禘壇上石中破博士議禮無高禘置石之文未知設

造所由既已毀破可無改造東晉議以為石在壇上蓋

主道也禮制器弊則埋而置新今宜埋而更造不宜遂

廢後得高堂隆故事詔更鐫石令如舊置高禘壇上埋

破石入地一丈

按江東太廟北門內道西有石文如竹葉小屋覆之宋文帝元嘉中修廟所得

石陸澄以為晉孝武時郊禘石然則江左亦北齊制高有此禮矣或曰百姓祀其旁或謂之落星也

禘壇於南郊旁廣輪二十六尺高九尺四陛三壝每歲

玄鳥至之日皇帝親帥六宮祀青帝于壇以太昊配而
祀高禘之神以祈子其儀青帝北方南向配帝東方西
向禘神壇下東陞之南西向禮用青珪束帛牲共以一
太牢祀日皇帝袞冕乘玉輅皇后褱衣乘重翟皇帝初
獻降自東陞皇后亞獻降自西陞並詣便座夫人終獻
上嬪獻于禘神訖帝及后並詣攢位乃送神皇帝皇后
及羣臣皆拜乃撤就燎禮畢而還隋亦以玄鳥至日祀
高禘于南郊壇牲用一太牢唐月令亦以仲春玄鳥至

之以太牢祀于高禘天子親往

月令經文及注不言有壇廟也

袞禊

周制春官女巫掌歲時袞除釁浴漢高后八月袞于灊
上後漢三月上巳官民皆絜於東流水上曰洗濯袞除
去宿垢疾為大絜魏氏以來但用三月三日不用上巳
也晉公卿以下至于庶人皆禊洛水之側趙王倫篡位
三日會天泉池誅張林懷帝亦會天泉池賦詩陸機云
天泉池南石溝引御溝水池西積石為禊堂跨水流杯

飲酒不言曲水韓詩曰鄭國之俗三月上巳之日溱洧

水上招魂續魄秉蘭草祓除不祥

蔡邕曰今三月上巳祓於水濱蓋出此也

一說三月三日清明之節將修事於水側以祈豐年也

一說郭虞三月上辰日上巳日二日產三女並不育俗

以為大忌至此月巳日諱止家皆於東流水上為祈禳

自潔濯謂之禊祠引流行觴遂成曲水梁劉昭曰郭虞

之說良為虛誕假有庶人旬內天其三女何足警彼風

俗乎杜篤賦乃稱王侯公主暨于富商用事伊洛帷幔

玄黃本傳大將軍梁商亦歌泣于洛楔也劉禎魯都賦
曰素秋二七天漢指隅人胥袂襪國子水嬉此用七月
十四日也東晉元帝詔罷三日弄具海西公于鍾山立
流杯曲水延百僚皆其事也齊以三月三日曲水會古
楔祭也今相承為百戲之具雕弄巧飾增損無常

諸雜祠

周立壽星祠於下杜亳

徐廣云京兆杜縣有亳亭也

時奉焉又立杜

主祠因宣王殺右將軍杜伯不以罪後宣王田于圃田

見杜伯執弓矢射王王伏弓而死故周人尊其鬼而以

歲時奉祠秦立陳寶祠因文公獲若石于陳倉北阪城

祠之

蘇林曰質如石如肝

其神或歲不至或歲數來其來常以夜

光輝若流星色赤黃長五丈從東方來集于祠城若雄

野雞其聲殷殷云野雞夜鳴以應之祠以一牢名曰陳

寶

臣瓚曰陳倉縣有寶夫人祠或一歲二歲與葉君合葉君神來時天為之雷鳴

二世時若陳

寶節來一祠春夏用騂秋冬用駟德公立卜居雍雍之

諸祠自此興用三百牢於鄜時作伏祠

孟康曰六月伏日也周時無至

此乃有之師古曰立秋之後以金代磔狗邑四門以禦火金畏於火故至庚日必伏庚金也

蠱災始皇東游海上祠八神求仙人其祀莫知起時

神八

一曰天主祠天齊天齊淵水居臨菑南郊山下者二曰地主祠泰山梁父蓋天好陰祠之必于高山之下小山之上命曰時地貴陽祭之必於澤中圜丘三曰丘主祠蚩尤蚩尤在東平陸監鄉齊之西境也四曰陰主祠三山三山即蓬萊方丈瀛洲三神山五曰陽主祠之衆山在東萊六曰月主祠萊山山在東萊長廣皆在齊北並勃海七曰日主祠成山山在東萊不夜縣斗入海景居齊東北隅以迎日出八曰四時主祠琅邪琅邪在齊東北蓋歲之所始也皆用一牢具祀而巫祝所損益珪幣雜異焉

漢高帝天下已定令祝

立蚩尤之祠於長安又置祠祀官女巫其梁巫祀天地

天社天水房中堂上之屬晉巫祠五帝東君雲中君巫

社巫祠族人炊之屬

師古曰東君日也雲中君謂雲神也族人炊古主炊母之神也

秦

巫祠杜主巫保族壘之屬

杜主即周之杜伯也巫保族壘二神名壘音力追反

荆

巫祠堂下巫先司命施糜之屬

堂下在堂之下巫先巫之最先者也司命說者

云文昌第四星也施糜其先常施設糜鬻者也

九天巫祀九天

師古曰九天者謂中央四方四

維也皆以歲時祠宮中武帝即位厚禮置祠神君於內中

聞其言不見其人

神君者長陵女子產乳而死見神於先後宛若宛若祠于其室人多往祠

平原君往祠其後子孫尊崇按平原君武帝外祖母也先後妯娌也宛若字也

又帝師少君求

仙始親祠竈

少翁言於帝曰祠竈皆可致物物鬼物也致物而丹沙化為金

又立粵祠

雞卜自此用

持雞而卜如鼠卜也

是時既滅兩粵粵人勇之乃言

粵人俗鬼

師古曰勇之言其俗尚鬼神之事而其祠皆見鬼數有效昔東甌王敬鬼壽百六十歲後

世怠慢故衰耗迺命粵巫立粵祠祝文安臺無壇亦祠天神帝百鬼宣帝時南郡獲白虎

獻其皮牙爪帝為立祠又方士言隋侯劍寶玉寶璧周

康寶鼎立四祠於未央宮又祠天封苑火井於鴻門

河西

鴻門有天封苑火井祠火從地中出也

又立歲星辰星太白熒惑南斗祠

於長安城旁又祠三山八神於曲城


東萊縣也

蓬山石社石

鼓於臨朐又有月祠蚩尤勞谷五牀山五帝仙人玉女
金馬碧雞等神遣諫議大夫王褒使持節而求焉後魏
道武帝初立兩彗星見劉后使日者占曰祈之則掃定
天下后從之故立其祠又立歲神十二歲一祭以十月
用牛一雞三又立土神四歲二祭常八月十月用羊又
立獻明以上天神四十所歲祭其神尊以馬次以牛小
以羊使女巫行事



通志卷四十三



總校官庶吉士臣侍朝

校對官編修臣閔惇大

膳錄監生臣鄭遇亨